

現代生活藝術系列

華嚴經疏論纂要 57

——十迴向品之十一

華藏淨宗學會印贈

大方廣佛華嚴經疏論纂要卷第五十七

五臺山清涼國師澄觀疏鈔

太原方山長者李通玄 論

閩鼓山私淑比丘道需纂要

十迴向品第二十五之十一

○第九無著無縛解脫迴向。長行中亦先明位行。
後顯位果。前中亦三。今初牒名徵起。

佛子云。何爲菩薩摩訶薩無著無縛解脫迴向。

疏謂理智無依。不爲能所見著。相惑所縛。由此卽
名解脫。此約行體釋之。故本業云。以諸法無二般。

若無生。一諦平等。三世一合相故。又解脫者。亦作用自在。如不思議等。此約行用。由攝善根。皆用廻向。普賢三業無邊自在德用故。於何無縛著耶。謂心等十。以自身有心身口業果。及所作佛事。有世界佛刹衆生法智等故。不爲何等所縛著耶。畧如上說。別有十事五對。一由離凡故。不縛生死。以出小乘。不著二乘。二離六識。取不縛外境。離第七執。不著於內。三離現行縛。無種子著。四不取有縛。不執空著。五無惑障縛。無智障著。皆縛麤著細。若約一事。由著故縛。義如總中。或縛著一義。此約無礙。

大用受名。通能所廻向。約脫惑障。無縛無著。卽是
解脫。約用解脫。乃無縛著之解脫。若望心等。亦是
無縛著之心。卽上體用。竝爲其性。

論第九無著無縛解脫廻向。以方波羅密爲體。以
善財所見天神爲所表。此位之行也。所居之城。名
墮羅鉢底。神號大天。城名墮羅鉢底者。此曰有門
城。此是此界乾坤。以乾爲天門。已後次第見地神。
以此二位。明和會此十廻向位之智極悲終。天神
表法空智之極。地神表大慈悲至極。厚載萬物。育
含生故。像如父母位也。天神現無量種衆寶。積聚

如山。地神放光。地震嚴寶。種種寶物。處處莊嚴。地爲淨利。衆多寶藏。自然踊現。明天神地神。隨業養育。濟物之德廣大。至文方明。畧舉會通表法之意。令後學者易見其意。不迷教行。不迂修行。表法中。明智淨稱天之性。卽法財充滿。功德寶出現。如山。若純淨大悲。育載萬物。如地無勞故。地體本唯淨土。此唯智悲之淨極故。卽佛國莊嚴淨也。此明神智應真。德會天地。濟育萬物也。亦是天地之神靈。是菩薩約位所堪。治眞俗之行。此位天神表之。明升進理智幽微。像天靈而不測。神功萬有。以不作

而爲之

○第二廣釋中分二。一。翻所廻善根。二。佛子下能
廻向行。三。菩薩摩訶薩如是廻向時。如三世下。
翻廻向成益。今初

佛子。是菩薩摩訶薩於一切善根。心生尊重。所謂於
出生死。心生尊重。於攝取一切善根。心生尊重。於希
求一切善根。心生尊重。於悔諸過業。心生尊重。於隨
喜善根。心生尊重。於禮敬諸佛。心生尊重。於合掌恭
敬。心生尊重。於頂禮塔廟。心生尊重。於勸佛說法。心
生尊重。於如是等種種善根。皆生尊重。隨順忍可。

疏先總標尊重。以一毫之善皆佛因故。無非佛所流故。次所謂下別顯後於如是下總結並可知。以一毫下卽生八公解法華。一毫之善發跡顯佛舉手低頭皆已成佛。言無非佛流。卽涅槃意乃至外道典籍亦佛法流。况內法耶。大小等教皆從如來大悲所流故。

○第二廻向行中二。先仍前進修擬將廻向。一正明行願。今初

佛子。菩薩摩訶薩。於彼善根皆生尊重隨順忍可時。究竟欣樂堅固信解。自得安住。令他安住勤修無著。自在積集成勝志樂。住如來境。勢力增長悉得知見。
疏亦一先總牒前後究竟下別顯修相文有十句。

前五修前卽釋尊重等言。謂一欣樂故尊重。一信解故忍可。三自隨順。四令他順。五總顯無著以該上四。後五進修。一積集勝進。二志樂普賢無方德用。三上入佛境。四善根增芻。五知見逾明。

○第二正明願行中義有十門文分爲二第一廣顯其相。二佛子菩薩摩訶薩以彼善根如是廻向所謂心無縛下總結多門前中分二先明衆生及菩提廻向後佛子菩薩摩訶薩以無著無縛解脫心廻向不分別下實際廻向前明廣大後顯甚深廣大廻向有六十一門甚深之內有

二十門。并前尊重進修復二十門。總有百一門。
顯圓融無盡深廣無礙爲大廻向。就廣大六十
一門。廣顯普賢自在德用。大分爲二。初之四門
總顯餘皆別明。今初

以諸善根。如是廻向。所謂以無著無縛解脫心。成就
普賢身業。以無著無縛解脫心。清淨普賢語業。以無
著無縛解脫心。圓滿普賢意業。以無著無縛解脫心。
發起普賢廣大精進。

疏前三成三業。以下諸門。不出三業故。後一精進。
通策萬行故。於中無著無縛解脫心。是能廻之心。

成就普賢身業。正是所向。他皆倣此。前諸善根。卽是所廻。故以諸善根之言。下流八十門內。此一廻向。不願成佛。願成普賢者。以普賢通於位前。及以位後。得道不捨因行。窮盡生界利樂。有情故。願成普賢。兼二廻向。下別顯中。一門內。皆攝法界。自在德用。或理或行。或智或境。或自行。或化生。或體或用。或因或果。或人或法。皆各總攝一切法故。不可相從。

○別科畧分爲二。初一十三門。顯普賢自分究竟。卽位中普賢。後三十四門。顯普賢勝進究竟。卽

位後普賢。一分無礙。是普賢德。前卽因圓果滿。
後卽得道不捨因行。故二段中皆含因果。今初
分三。初四成普賢總持德。二有十二願成普賢
自在功用。三有七願願成普賢行。然諸門德多
約三業。今初總持

以無著無縛解脫心。具足普賢無礙音聲陀羅尼門。
其聲廣大普偏十方。以無著無縛解脫心。具足普賢
見一切佛陀羅尼門。恒見十方一切諸佛。以無著無
縛解脫心。成就解了一切音聲陀羅尼門。同一切音
說無量法。以無著無縛解脫心。成就普賢一切劫住

陀羅尼門。普於十方修菩薩行。

疏總持亦具三業。初一語業總持。二身業見佛。三意業解了。後一三業用之時處。標名約時辨用。就處文互顯耳。

○第二力用

以無著無縛解脫心成就。普賢自在力。於一衆生身中示修一切菩薩行。盡未來劫常無間斷。如一衆生身。一切衆生身悉亦如是以無著無縛解脫心成就。普賢自在力。普入一切衆道場。普現一切諸佛前。修菩薩行。以無著無縛解脫心成就。普賢佛自在力。於

一門中。示現經不可說。不可說劫無有窮盡。令一切衆生皆得悟入。以無著無縛解脫心。成就普賢佛自在力。於種種門中。示現經不可說。不可說劫無有窮盡。令一切衆生皆得悟入。其身普現一切佛前。以無著無縛解脫心。成就普賢自在力。念念中。令不可說不可說。衆生住十力智心。無疲倦。以無著無縛解脫心。成就普賢自在力。於一切衆生身中。現一切佛自在神通。令一切衆生住普賢行。以無著無縛解脫心。成就普賢自在力。於一切衆生語言中。作一切衆生語言。令一切衆生一一皆住一切智地。以無著無縛

解脫心。成就普賢自在力。於一一衆生身中普容納一切衆生身。令皆自謂成就佛身。以無著無縛解脫心。成就普賢自在力。能以一華莊嚴一切十方世界。
疏力用中復二。初九願。多攝入自在。文有三業化時處等。可知

以無著無縛解脫心。成就普賢自在力。出大音聲。普遍法界。周聞一切諸佛國土。攝受調伏一切衆生。以無著無縛解脫心。成就普賢自在力。盡未來際。不可說不可說劫。於念念中悉能偏入一切世界。以佛神力隨念莊嚴。以無著無縛解脫心。成就普賢自在力。

盡未來際所住之劫。常能徧入一切世界。示現成佛。
出興於世。

疏後三廣大自在可知

○第三成普賢行

以無著無縛解脫心成普賢行。一光普照盡虛空界。
一切世界。以無著無縛解脫心成普賢行。得無量智。
慧具一切神通說種種法。以無著無縛解脫心成普
賢行。入於如來盡一切劫不可測量神通智慧。以無
著無縛解脫心成普賢行。住盡法界諸如來。所以佛
神力修習一切諸菩薩行。身口意業曾無懈倦。

疏行中分二。初四願成神通

以無著無縛解脫心成普賢行。不違於義。不壞於法。
言詞清淨。樂說無盡。教化調伏一切衆生。令其當得
一切諸佛無上菩提。以無著無縛解脫心修普賢行。
入一法門時。放無量光照不思議。一切法門如一法
門。一切法門皆亦如是。通達無礙。究竟當得一切智
地。以無著無縛解脫心住菩薩行。於法自在。到於普
賢莊嚴彼岸。於一境界。皆以一切智觀察悟入。而
一切智亦不窮盡。

疏

二有三願。願成四辨。初一總具四辨。次二別顯

去義初法後義卽顯果滿究竟

○第二。明勝進究竟而言因者。乃果中之因。於中分三。初有九門。攝法廣大自在德。次有十五門。相卽相入。重重德。後有十門。明微細容持。甚深。

德今初

以無著無縛解脫心。始從此生盡未來際。住普賢行。常不休息。得一切智悟。不可說。不可說。真實法。於法究竟無有迷惑。以無著無縛解脫心修普賢業。方便自在得法光明。於諸菩薩所行之行。照了無礙。以無著無縛解脫心修普賢行。得一切方便智。知一切方

便。所謂無量方便。不思議方便。菩薩方便。一切智方便。一切菩薩調伏方便。轉無量法輪方便。不可說時方便。說種種法方便。無邊際無畏藏方便。說一切法無餘方便。

疏初中分六。初三願成智。前一實智。後二方便智。初是照行方便。後一照方便之方便。

以無著無縛解脫心。住普賢行。成就身業。令一切衆生見者歡喜。不生誹謗。發菩提心。永不退轉。究竟清淨。以無著無縛解脫心。修普賢行。得了一切衆生語言清淨智。一切言詞具足莊嚴。普應衆生。皆令歡喜。

疏二有二願成利益。不空三業。

以無著無縛解脫心住普賢行。立殊勝志具清淨心。
得廣大神通。廣大智慧。普詣一切廣大世間。廣大國
土。廣大衆生。所說一切如來不可說廣大法。廣大莊
嚴圓滿藏。

疏三有一願。廣大三業。廣大衆生者。具大心故。

以無著無縛解脫心成滿普賢迴向行願得一切佛
清淨身。清淨心。清淨解攝佛功德。住佛境界。智印普
照。示現菩薩清淨之業善入一切差別句義。示諸佛
菩薩廣大自在。爲一切衆生現成正覺。

疏四一願成清淨三業

以無著無縛解脫心。勤修普賢諸根行。願得聰利根。
調順根。一切法自在根。無盡根。勤修一切善根。根一
切佛境界平等根。受一切菩薩不退轉記大精進根。
了知一切佛法金剛界根。一切如來智慧光照金剛
談根。分別一切諸根自在根。安立無量衆生於一切
智根。無邊廣大根。一切圓滿根。清淨無礙根。

疏五一願諸根三業別有十四根。皆以勝用增上
光顯義故。立以根名。初聰利等三根。約眼等六。兼
五受根。聰利者領覽敏疾故。調順者內無剛強故。

自在者。外境不牽故。餘約信等五根。初一信根。信心無盡故。亦兼命根。次一進。次一念。唯念佛平等。故次一定及精進。以不退轉是定義故。餘七皆慧。

〔鈔別有十四根者。按經文數有十四義。合二十二根。如俱舍第十一明。皆以勝用者。彼論解根有二義。此依薩婆多宗。故彼論云。最勝自在光顯名根。由此總成根增上義。解云。根體勝故爲最勝。根用勝故。名爲自在體。用雙彰。名爲光顯。由有最勝自在光顯名。爲增上。將增上義。以釋根也。論云。此增上義誰望於誰。釋曰。謂二十二根。望誰增上。頌曰。傳說五於四。四根於二種。五八染淨中。各別爲增上。釋曰。傳說五於四者。眼等五根。於其四事。能爲增上。莊嚴身。二導養身。三生識等。四不共事。釋曰。初旨。聲等非莊嚴故。二眼見耳聞。避險難。故香味觸。三是段食性。能受用故。三生識等。等取心所。四不共事。眼唯見等。言四根於二種者。謂男女命意。名爲四根。各於二種而得增上。男女於二得增

上者。一。有情異謂男女類別。二分別異謂形相言音乳房等別命根二者。一能續過去衆同分。二能持現在衆同分。意根二者。一能續後有。二自在隨行。謂經云。心能導世間。卽自在義。心能徧攝受。卽受順三毒染信等八根順清淨法。隨生長故頌云。未知當知根具知根亦爾。於得後後道涅槃等增上釋曰。言亦爾者。類顯一一各能爲根。未知根是見道已。知根是修道。具知根是無學道。未知於已知根道有增上用。見道引修道故。已知於具知道有增上用。引無學故。具知於涅槃有增上用。由具知根心得解脱。心若解脱方證涅槃故。已知是未知之後。具知是已知之後。故言後後兼五受根者。頌云。身不悅名苦。損惱義故。卽此悅名樂。攝養義故。及三定心悅。謂第三禪五識無故。無有身樂。心悅名樂。餘處悅名喜。餘處謂初二禪及欲界處。心悅名喜。心不悅名憂。中捨二無別。中謂非苦非樂。此處中故。名爲捨根捨在身心同無分別。任運而生。故雖通二身心二捨。同一捨根耳。見修無學道。

依九立三根者。釋曰。九謂意喜樂捨信等五根。若在見道。依此九立。未知當知根修道及無學亦依九立。已知具知論云。如是三名。因何而立。謂在見道。有未曾知。當知行轉故。說彼名。未知當知根。

金剛界根者。義兼定慧。金剛三昧。即是定故。金剛正智。即是慧故。界即是性。智了心姓名上定故。亦卽未知當知根。現觀位中得不壞故。金剛燄者。焰通事理。及能所故。卽已知根已成智故。離世間品

云。如金剛根。證知一切諸法性故。卽此界根。又云。

金剛光燄根。普照一切佛境界故。佛境有二。一所

觀境。通於事理。二分齊境。卽能觀智。亦得稱境。金

剛燄下文中有二。一正釋。金剛發燄。金剛如燈。發燄如教。故雙了事理。言及能所者。照境爲所。亦兼照

於能觀智也。卽已知根者通照事理。如修道中故。二離世間下引證。次三調化後二果圓惑淨。卽具知根也。

以無著無縛解脫心修普賢行。得一切菩薩神力。所謂無量廣大力神力。無量自在智神力。不動其身。普現一切佛刹神力。無礙不斷自在神力。普攝一切佛刹置於一處神力。一身徧滿一切佛刹神力。無礙解脫遊戲神力。無所作一念自在神力。住無性無依神力。一毛孔中次第安立不可說世界。徧遊法界諸佛道場。示諸衆生皆令得入大智慧門神力。

疏六一願神力三業文雖闕語義亦兼具

○第二卽入重重德

以無著無縛解脫心。入普賢門。生菩薩行。以自在智。於一念頃。普入無量諸佛國土。一身容受無量佛刹。獲能嚴淨佛國土。智恒以智慧觀見無邊諸佛國土。永不發起二乘之心。以無著無縛解脫心修普賢方便。行入智慧境界。生如來家。住菩薩道。具足不可說不可說無量不思議殊勝心。行無量願未曾休息。了知三世一切法界。以無著無縛解脫心成就普賢清淨法門。於一毛端量處。悉包容盡虛空徧法界。不可說不可說。一切國土。皆使明見。如一毛端量處。徧法

界虛空界一一毛端量處悉亦如是

疏分六初三入普賢門一行門二智門三法門。

以無著無縛解脫心成就普賢深心方便於一念心中現一衆生不可說不可說劫念心如是乃至現一切衆生爾許劫念心以無著無縛解脫心入普賢迴向行方便地於一身中悉能包納盡法界不可說不可說身而衆生界無所增減如一身乃至周徧法界一切身悉亦如是以無著無縛解脫心成就普賢大願方便捨離一切想倒心倒見倒普入一切諸佛境界常見諸佛虛空界等清淨法身相好莊嚴神力自

在常以妙音開示演說無礙無斷。令其聞者如說受持。於如來身了無所得。

疏二有三願成普賢方便。一淡心方便。以契理淡心。故於一心能現多心。二廻向方便。一身悉包一切。但向一身已向一切。故云方便。三大願方便。以無得心入佛境故。

以無著無縛解脫心修普賢行住菩薩地於一念中入一切世界。所謂入仰世界。覆世界。不可說不可說。十方網一切處廣大世界以因陀羅網分別方便。普分別一切法界。以種種世界入一世界。以不可說不

可說無量世界入一世界。以一切法界所安立無量世界入一世界。以一切虛空界所安立無量世界入一世界。而亦不壞安立之相悉令明見。

疏三有二願入普賢位初一始入於地故能入刹無礙

以無著無縛解脫心修習普賢菩薩行願得佛灌頂。於一念中入方便地成滿安住衆行智寶悉能了知一切諸想所謂衆生想法想刹想方想佛想世想業想行想界想解想根想時想持想煩惱想清淨想成熟想見佛想轉法輪想聞法解了想調伏想無量想。

出離想種種地想無量地想菩薩了知想菩薩修習
想菩薩三昧想菩薩三昧起想菩薩成想菩薩壞想
菩薩歿想菩薩生想菩薩解脫想菩薩自在想菩薩
住持想菩薩境界想劫成壞想明想暗想晝想夜想
半月一月一時一歲變異想去想來想住想坐想睡
想覺想如是等想於一念中悉能了知而離一切想
無所分別斷一切障無所執著一切佛智充滿其心
一切佛法長其善根與諸如來等同一身一切諸佛
之所攝取離垢清淨一切佛法皆隨修學到於彼岸

疏後一終成故得灌頂成智於中三初標能所知

次所謂下。列所知想。有五十二。其業行界解根等。
皆十力智所知。如初會釋。餘亦攝在其內。持謂執
持善惡。地謂斷證分齊。菩薩成者解行正命。菩薩
壞者戒見邪命。餘皆可知。後如是等想下。結能知
德。謂離四過失。具五功德。一切佛智下。即具五功德。謂離四過等者。從一。
以無著無縛解脫心爲一切衆生修普賢行生大智
寶。於一一心中知無量心。隨其依止。隨其分別。隨其
種性。隨其所作。隨其業用。隨其相狀。隨其思覺。種種
不同靡不明見。以無著無縛解脫心成就普賢大願
智寶。於一處中知於無量不可說處。如於一處於一

切處悉亦如是以無著無縛解脫心修習普賢行業智地於一業中能知無量不可說不可說業其業各以種種緣造明了知見如於一業於一切業悉亦如是以無著無縛解脫心修習普賢知諸法智於一法中知不可說不可說法於一切法中而知一法如是諸法各各差別無有障礙無違無著

疏四有四願成普賢智。一成行智無機不知以化衆生爲其行故。二大願智無處不知願偏化故。三窮業智了因緣故。四知法智知化法故。

以無著無縛解脫心住菩薩行得具普賢無礙耳根。

於一言音中知不可說不可說言音無量無邊種種
差別而無所著如於一言音於一切言音悉亦如是
以無著無縛解脫心修普賢智起普賢行住普賢地
於一一法中演說不可說不可說法其法廣大種種
差別教化攝受不可思議方便相應於無量時於一
切時隨諸衆生所有欲解隨根隨時以佛音聲而爲
說法以一妙音令不可說道場衆會無量衆生皆悉
歡喜一切如來所無量菩薩充滿法界立殊勝志生
廣大見究竟了知一切諸行住普賢地隨所說法於
念念中悉能證入一剎那頃增長無量不可說不可

說大智慧聚。盡未來劫。如是演說。於一切刹。修習廣大虛空等行。成就圓滿。

疏五有二願。願成普賢聽說。初耳無不聽。次舌無不演。

以無著無縛解脫心修習普賢諸根行門。成大行王。於一一根中。悉能了知無量諸根。無量心樂。不思議境界所生妙行。

疏六有一願。成知根德。一攝一切。於中言大行王者。以徧知根於化行自在故。一根知一切根者。有二義。一約理融。二約事別。謂如一人。有多乘根性。

一一乘中有無量品。如聲聞中。有信行法行等。此

二通有退思護住等上中下根。隨於一品復有信

等種種善根之異。

鈔如聲聞等。此二通有退思護住者。俱舍二十五云。阿羅漢有

六。謂退至不動。前五信解生總名時解脫後不時

解脫。從前見至生釋曰。契經說有六阿羅漢。一者

退法。謂遇少緣便退所得。二者思法。謂懼退失恆

思自害。三者護法。謂於所得喜自防護。四安住法。

無勝退緣雖不自護亦能不退無勝加行亦不增

進。五堪達法。謂性堪能好修練根速達不動。六不

動法。不爲煩惱所退動故。前五種性從無學位信

解性生。此五總名時解脫也。以要待時方能入定。

及心解脫言。待時者。此有六種。一得好衣。二得好

食。三得好臥具。四得好處。五得好說法師。六得好

同學。後不動性。名不時解脫。謂是利根以不待時

便能入定。及心解脫故。從無學位見至性生。釋曰。

論云。從無學位信解生等者。二十三論云。第十六

心隨三向住果。名信解見至。亦由鉢利別釋曰。隨

論云。從無學位信解生等者。二十三論云。第十六

三向住果者隨三向人至住三果隨鈍利根得名不同若鈍根人名爲信解若利根者名爲見至前隨信行今名勝解謂由信故勝解相顯名爲信解前隨法行今名見至謂由向見得至果見故名見至此二聖者信慧互增故標信解見至名別言謂由向見得至果見者以法行人見理情多故

○第三得色甚微細下十門。明願得普賢微細知法以所知之事幽微故能知之智微細微細有

二。一準無性攝論以難知故。二就經宗於一法

中。有一切法炳然齊現故如文云衆生業報微細等卽約初義如在母胎等通於二義十門卽

爲十段。第一明世間法微細

以無著無縛解脫心住普賢行大迴向心得色甚微

細智。身甚微細智。刹甚微細智。劫甚微細智。世甚微細智。方甚微細智。時甚微細智。數甚微細智。業報甚微細智。清淨甚微細智。如是等一切甚微細。於一念中悉能了知。而心不恐怖。心不迷惑。不亂。不敢。不濁。不劣。其心一緣。心善寂定。心善分別。心善安住。

疏瑜伽云。色微細性有三。一損減微細性。卽析至極微。二種類微細性。謂如風等。色中有色。三心自在轉微細性。卽色無色界色。如經說。有天在一毛端量地處。展轉無礙。此三卽難知微細也。餘之難知類此。各有異義。文中分三。初標德所依。次得色。

下。列所得法。後如是等下。結能知之德。不怖甚深。
不迷理事。亂謂錯謬。散謂不專。濁謂垢染劣無堪
任。今皆反此。上。明離過。下。顯成德。一緣。謂專注一

境。故不散。善寂。謂心境兩亡。故不亂。卽定而知名。
善分別。故不迷。卽照而止。名善住。故不怖。此能知

之德。以在初門。義通下九。皆應爾知。

鈔。一緣謂專注者。釋曰。此

下成德。翻上諸過。而小不次。一緣成上不散。以善寂成上不亂。以善分別成上不迷。以善住成上不怖。法

○第二知衆生趣微細智

以無著無縛解脫心。住菩薩智。修普賢行。無有懈倦。

能知一切衆生趣甚微細。衆生死甚微細。衆生生甚
微細。衆生住甚微細。衆生處甚微細。衆生品類甚微
細。衆生境界甚微細。衆生行甚微細。衆生取甚微細。
衆生攀緣甚微細。如是等一切甚微細。於一念中悉
能了知。

疏住謂住壽餘並可知

○第三知菩薩行德微細智

以無著無縛解脫心立深志樂修普賢行能知一切
菩薩從初發心爲一切衆生修菩薩行甚微細。菩薩
住處甚微細。菩薩神通甚微細。菩薩遊行無量佛刹

甚微細菩薩法光明甚微細菩薩清淨眼甚微細菩
薩成就殊勝心甚微細菩薩往詣一切如來道場衆
會甚微細菩薩陀羅尼門智甚微細菩薩無量無畏
地一切辯才藏演說甚微細菩薩無量三昧相甚微
細菩薩見一切佛三昧智甚微細菩薩甚深三昧智
甚微細菩薩大莊嚴三昧智甚微細菩薩法界三昧
智甚微細菩薩大自在神通三昧智甚微細菩薩盡
未來際廣大行住持三昧智甚微細菩薩出生無量
差別三昧智甚微細菩薩出生一切諸佛前勤修供
養恒不捨離三昧智甚微細菩薩修行一切甚深廣

博無障無礙三昧智甚微細。菩薩究竟一切智地住持行智地。大神通地決定義地離翳三昧智甚微細。如是等一切甚微細悉能了知。

○疏列所得中。有二十句。前十別類。後十同明三昧。

以無著無縛解脫心修普賢行。悉知一切菩薩安立智甚微細。菩薩地甚微細。菩薩無量行甚微細。菩薩出生迴向甚微細。菩薩得一切佛藏甚微細。菩薩觀察智甚微細。菩薩神通願力甚微細。菩薩演說三昧甚微細。菩薩自在方便甚微細。菩薩印甚微細。菩薩

一生補處甚微細

疏於中三初標所修。次悉知下列所得。有四十一種。初十一事。位行成滿。

菩薩生兜率天甚微細。菩薩住止天宮甚微細。菩薩嚴淨佛國甚微細。菩薩觀察人中甚微細。菩薩放大光明甚微細。菩薩種族殊勝甚微細。菩薩道場衆會甚微細。菩薩徧一切世界受生甚微細。菩薩於一身示現一切身命終甚微細。菩薩入母胎甚微細。菩薩住母胎甚微細。菩薩在母胎中自在示現一切法界道場衆會甚微細。菩薩在母胎中示現一切佛神力。

甚微細菩薩示現誕生事甚微細菩薩師子遊行七步智甚微細菩薩示處王宮巧方便智甚微細菩薩出家修調伏行甚微細菩薩菩提樹下坐道場甚微細菩薩破魔軍衆成阿耨多羅三藐三菩提甚微細如來坐菩提座放大光明照十方界甚微細如來示現無量神變甚微細如來師子吼大涅槃甚微細如來調伏一切衆生而無所礙甚微細如來不思議自在力如金剛菩提心甚微細如來普護念一切世間境界甚微細如來普於一切世界施作佛事盡未來劫而無休息甚微細如來無礙神力周徧法界甚微

細。如來於盡虛空界一切世界普現成佛調伏衆生甚微細。如來於一佛身現無量佛身甚微細。如來於去來今三世中皆處道場自在智甚微細。

疏後生兜率下三十事。酬位滿大用。現八相等。其中。有菩薩佛名因果之異。皆是用中之事耳。其微細之事。離世間品。及不思議法品。廣酬。

如是等一切微細悉能了知。成就清淨普能示現。一切世間。於念念中增長智慧圓滿不退。善巧方便修菩薩行。無有休息成就。普賢迴向之地。具足一切。如來功德。永不厭捨。菩薩所行。出生菩薩現前境界。無

量方便皆悉清淨。普欲安隱一切衆生修菩薩行成就菩薩大威德地得諸菩薩心之樂欲獲金剛幢迴向之門出生法界諸功德藏常爲諸佛之所護念入諸菩薩深妙法門演說一切真實之義於法善巧無所違失起大誓願不捨衆生於一念中盡知一切心非心地境界之藏於非心處示生於心遠離語言安住智慧同諸菩薩所行之行以自在力示成佛道盡未來際常無休息一切世間衆生劫數妄想言說之所建立神通願力悉能示現

疏三如是下結能知德謂成普賢自在行德德亦

名益。此德通從諸智而生。亦可別配恐厭繁文。於中云心非心等者。以識緣境。名爲心地。以智了境。名非心地。識所了境。通於善惡。善唯有漏智所了境。唯無漏善。漏無漏境。心能含之。心卽名藏。故晉經云。究竟了知思議不思議地。諸功德藏。言於非心處。示生於心者。卽非心量之心量也。由此故能離言語道。安住智等。故晉經云。於不思議出生思議。示諸法門離言語道。上經云。菩薩住是不思議於中思議不可盡入。此不可思議處。思與非思俱寂滅。卽斯義也。以心與非心生滅真如。非卽離故。

不爲此釋。令人誤解。謂使無情有心。設令無情有心。既云示生。於理無失。餘文可知。鈔不爲此釋下。第一二揅濫人多誤解情作非情。非情作情。故下又縱云設言於非心處示生於心是非情爲情者。旣言示生。非眞無情矣。

○第五知衆生界智

以無著無縛解脫心修普賢行。得一切衆生界甚微細智。所謂衆生界分別甚微細智。衆生界言說甚微細智。衆生界執著甚微細智。衆生界異類甚微細智。衆生界同類甚微細智。衆生界無量趣甚微細智。衆生界不思議種種分別所作甚微細智。衆生界無量

雜染甚微細智。衆生界無量清淨甚微細智。如是等一切衆生境界。界甚微細。於一念中。能以智慧皆如實知。廣攝衆生而爲說法。開示種種清淨法門。令修菩薩廣大智慧。化身無量見者歡喜。以智日光照菩薩心。令其開悟智慧自在。

疏其第二知衆生趣。卽十力中自業智境。此知生界。卽是性異十力之中種種界智境。故晉經云。入衆生性微細也。文中三初標得所依。次得一切下。列所得智。於中十句。初總所謂下別。別言衆生界分別等者。亦可言衆生分別界等。一分別者。自性

強思起邪見等。一言說界者依邪師教。名言熏習等。三謂戒見等。四五可知。六求趣欲天。有求趣靜慮。邪梵行。求趣無色無想。各謂爲涅槃故。七謂諸行界。諸求衆生行各異故。隨一邪求。有裸形等種種殊故。八多貪瞋等雜染異故。九聞一乘三乘無量乘等皆清淨故。又染淨二句通前七句。謂有染分別淨分別等。又通有四義。故甚深微細。一顛倒卽空故。二理有真實故。三緣成離念故。四相入無羈故。三如是下。結能知德業初結德後廣攝下。略作業亦有通別。思以配之。

○第六知世界智

以無著無縛解脫心爲一切衆生於一切世界修普賢行。得盡虛空界法界一切世界甚微細智。所謂小世界甚微細智。大世界甚微細智。雜染世界甚微細智。清淨世界甚微細智。無比世界甚微細智。種種世界甚微細智。廣世界甚微細智。狹世界甚微細智。無礙莊嚴世界甚微細智。徧一切世界佛出現甚微細智。徧一切世界說正法甚微細智。徧一切世界普現身甚微細智。徧一切世界放大光明甚微細智。盡一切世界示現諸佛自在神通甚微細智。盡一切世界。

以一音聲示一切音甚微細智。入一切世界一切佛
刹道場衆會甚微細智。以一切法界佛刹作一佛刹
甚微細智。以一佛刹作一切法界佛刹甚微細智。知
一切世界如夢甚微細智。知一切世界如像甚微細
智。知一切世界如幻甚微細智。如是了知出生一切
菩薩之道。入普賢行智慧神通具普賢觀修菩薩行。
常無休息得一切佛自在神變具無礙身住無依智。
於諸善法無所取著心之所行悉無所得於一切處
起遠離想於菩薩行起淨修想於一切智無取著想。
以諸三昧而自莊嚴。智慧隨順一切法界。

疏文三。初總標。次所謂下別顯。有二十二智。初九直語器界。次九明其受用。其一多相作。亦是菩薩受用。後三正知無取著故。三如是下。顯能知德於中亦有通別。別可思之。

○第七知法界智

以無著無縛解脫心。入普賢菩薩行門。得無量法界甚微細智。演說一切法界甚微細智。入廣大法界甚微細智。分別不思議法界甚微細智。分別一切法界甚微細智。一念徧一切法界甚微細智。普入一切法界甚微細智。知一切法界無所得甚微細智。觀一切

法界無所礙甚微細智知一切法界無有生甚微細智於一切法界現神變甚微細智

疏此顯卽理之事法界故云一切法界卽事之理復云不生等亦初標所修次得無量下辨所得初句總餘十別

如是等一切法界甚微細以廣大智皆如實知於法自在示普賢行令諸衆生皆悉滿足不捨於義不著於法出生平等無礙之智知無礙本不住一切法不壞諸法性如實無染猶若虛空隨順世間起於言說開真實義示寂滅性於一切境無依無住無有分別

明見法界廣大安立。諸世間及一切法平等無二離一切著。

疏後結能知之德。唯就通說於中初標二利滿足。後不捨下釋成滿義。普賢行滿不出二種一證道。二化道初離一邊顯證道滿。不捨於義此離空邊。不著於法此離有邊故得平等無礙之智。言知無礙本卽是所證次不住下雙照二諦。明化道滿可知。

○第八知入劫智

以無著無縛解脫心修普賢行。生諸劫甚微細智所

謂以不可說劫爲一念甚微細智。以一念爲不可說劫甚微細智。以阿僧祇劫入一劫甚微細智。以一劫入阿僧祇劫甚微細智。以長劫入短劫甚微細智。以短劫入長劫甚微細智。入有佛劫無佛劫甚微細智。知一切劫數甚微細智。知一切劫非劫甚微細智。一念中見三世一切劫甚微細智。

疏初標次所謂下列

如是等一切諸劫甚微細。以如來智於一念中皆如實知得。諸菩薩圓滿行王心入普賢行心。離一切分別異道戲論心。發大願無懈息心。普見無量世界綱

無量諸佛充滿心。於諸佛善根諸菩薩行能聞持心。
於安慰一切衆生廣大行聞已不忘心能於一切劫
現佛出世心。於一一世界盡未來際行不動行無休
息心於一切世界中以如來身業充滿菩薩身心

疏後結能知德亦是益相先結後益可知

○第九知法智

以無著無縛解脫心修普賢行成不退轉得一切法
甚微細智所謂甚深法甚微細智廣大法甚微細智
種種法甚微細智莊嚴法甚微細智一切法無有量
甚微細智一切法入一法甚微細智一法入一切法

甚微細智。一切法入非法甚微細智。無法中安立一切法而不相違。甚微細智。入一切佛法方便無有餘甚微細智。

疏初標次所謂下列文有十句義有四重一法體具德二一切入一等。明法用卽入三入非法等。明理事相卽亦有無相卽以非法有三義一非善法故二非卽是無如兔角等三非卽是理今是後二次云無法亦卽非法晉本名非今譯以非通二義故互明之依第二義則法本自無因緣生諸故云安立若依第三則從無住本立一切法故不相違

四入方便無餘。是體用善巧。

如是等。一切世界。一切言說所安立法。諸微細智。與彼同等。其智無礙。皆如實知。得入無邊法界心。於一法界深心堅住。成無礙行。以一切智充滿諸根。入諸佛智正念方便。成就諸佛廣大功德。徧滿法界。普入一切諸如來身。現諸菩薩所有身業。隨順一切世界言詞演說於法。得一切佛神力所加智慧意業。出生無量善巧方便。分別諸法。薩婆若智。

疏後結德可知。

○第十得總知一切盡無餘微細智。故晉經十句。

皆有無餘之言

以無著無縛解脫心修普賢行。出生一切甚微細智。
所謂知一切剎甚微細智。知一切衆生甚微細智。知
一切法果報甚微細智。知一切衆生心甚微細智。知
一切說法時甚微細智。知一切法界甚微細智。知一
切盡虛空界三世甚微細智。知一切語言道甚微細
智。知一切世間行甚微細智。知一切出世行甚微細
智。乃至知一切如來道。一切菩薩道。一切衆生道。甚
微細智。修菩薩行住普賢道。若文若義。皆如實知。生
如影智。生如夢智。生如幻智。生如響智。生如化智。生

如空智。生寂滅智。生一切法界智。生無所依智。生一切佛法智。

疏文中分四。初總標。一所謂下別列。卽牒前十門。

名或小變。次或不等。會意皆同。

鈔名或小異者。今當會之。

利。卽第

六世界。二衆生。卽第一衆生趣。三一切法界報。卽

第九法四衆生心。卽第五衆生界。五一切說法時。

卽第八入劫。六法界。卽第七法界。七盡虛空界。一

切三世。亦屬第八入劫。八語言道。卽第四菩薩位。

德位。但假名故。九世間行。卽第一世間法。十出世

間行。卽第三菩薩行德。甚微細。十句結於九門。故

時。一重明而劫。卽長時。三世。卽短時矣。三乃至下。結所不說。四生如影

下。顯知之德。亦有通別。通從前生。別則次第。對前十句。一外刹是心之影像故。今能知刹。則知影像。

一衆生想現故云如夢三者果報緣生故如幻四
心性寂然緣感成異故云如響五說時如化六卽
空界七言語本寂八卽法界九世間無依十出世
間行卽是佛法

○第二廻向實際

佛子菩薩摩訶薩以無著無縛解脫心廻向不分別
若世間若世間法不分別若菩提若菩提薩埵不分
別若菩薩行若出離道不分別若佛若一切佛法不
分別若調伏衆生若不調伏衆生不分別若善根若
迴向不分別若自若他不分別若施物若受施者不

分別若菩薩行。若等正覺。不分別若法若智。

疏文有十對。初假實對。二卽人法求菩提故。名菩提薩埵。三卽體用。亦名能所。梁攝論云。於分別依他起性。不見所行。行及能行道。卽此義也。謂證智能行則出離故。第九因果等正覺者。約人契法異前菩提。二中雖有菩薩行意。取所行此約爲因。故不重也。十法卽教法。教智相對。餘竝可知。

○第二大科總結多門

佛子菩薩摩訶薩以彼善根如是迴向。所謂心無著。無縛解脫。身無著。無縛解脫。口無著。無縛解脫。業無

著無縛解脫。報無著無縛解脫。世間無著無縛解脫。
佛剎無著無縛解脫。衆生無著無縛解脫。法無著無
縛解脫。智無著無縛解脫。

疏由心無縛令身等皆無縛著也

○大科第三行成利益

菩薩摩訶薩如是迴向時。如三世諸佛爲菩薩時所
修迴向而行迴向學。過去諸佛迴向成未來諸佛迴
向住。現在諸佛迴向安住過去諸佛迴向道不捨未
來諸佛迴向道。隨順現在諸佛迴向道勤修過去諸
佛教成就未來諸佛教了知現在諸佛教滿足過去

諸佛平等。成就未來諸佛平等。安住現在諸佛平等。
行過去諸佛境界。住未來諸佛境界。等現在諸佛境
界。得三世一切諸佛善根。具三世一切諸佛種性。住
三世一切諸佛所行。順三世一切諸佛境界。

疏初牒後顯。顯有十句。初總餘別。別中一廻向者。
正起修行。二道者。常游法徑。三廻向教。四平等智。
五所緣境。六功行絕修。是佛善根。七了見本源。成
如來性。八無礙悲智。是佛所行。如出現品。九無盡
體用。是分齊境。

○第三結名

佛子是爲菩薩摩訶薩第九無著無縛解脫心迴向

疏從初廣說故有心言

○第二位果

菩薩摩訶薩住此迴向時一切金剛輪圍山所不能壞於一切衆生中色相第一無能及者悉能摧破諸魔邪業普現十方一切世界修菩薩行爲欲開悟一切衆生以善方便說諸佛法得大智慧於諸佛法心無迷惑在在生處若行若住常得值遇不壞眷屬三世諸佛所說正法以清淨念悉能受持盡未來劫修菩薩行常不休息無所依著普賢行願增長具足得

一切智施作佛事。成就菩薩自在神通。

疏成三種果。一現成果。於中先自利。後爲欲下利他。二在在下。成當得果。初自利。後盡未來下。兼於自他。三普賢下。明終成果。因果無礙。

○第二應頌

爾時金剛幢菩薩承佛神力。普觀十方而說頌言。

普於十方無等尊。未曾一起輕慢心。

隨其所修功德業。亦復恭敬生尊重。

所修一切諸功德。不爲自己及他人。

恒以最上信解心。利益衆生故迴向。

未嘗暫起高慢心 亦復不生下劣意

如來所有身等業 彼悉請問勤修習

疏五十一偈分二先頌位行後二位果前中三初

三頌所廻善根。一所修下。四十四頌頌廻向行。三

過去下二頌頌行成利益。今初云不爲自己等者。

照理大智無私自他同體大悲利益廻向

所修種種諸善根 悉爲利益諸含識

安住深心廣大解 廻向人尊功德位

疏二頌廻向中但頌廣大畧不頌甚深以偏在廣
大中故文二初一偈頌普賢自分究竟

世間所有無量別

種種善巧奇特事

麤細廣大及甚深

靡不修行皆了達

世間所有種種身

以身平等入其中

於此修行得了悟

慧門成就無退轉

世間國土無量種

微細廣大仰覆別

菩薩能以智慧門

一毛孔中無不見

疏餘頌勝進究竟於中前長行有三。一攝法廣大德。二卽入重重德。三微細容持德。今通頌之。但顯微細於中分十。第一有三偈。頌世間微細智。

衆生心行無有量

能令平等入一心

以智慧門悉開悟

於所修行不退轉

疏二二偈頌衆生趣趣由行別故

衆生諸根及欲樂

上中下品各不同

一切甚深難可知

隨其本性悉能了

衆生所有種種業

上中下品各差別

菩薩深入如來力

以智慧門普明見

疏三有二偈超頌第五衆生界界卽根性故

不可思議無量劫

能令平等入一念

如是見已徧十方

修行一切清淨業

過去未來及現在

了知其相各不同

而亦不違平等理

是則大心明達行

世間衆生行不同

或顯或隱無量種

菩薩悉知差別相

亦知其相皆無相

疏四有三偈頌第三菩薩行德菩薩亦受衆生之

稱神通等行名顯三昧等行名隱餘義細詳

十方世界一切佛所現自在神通力

廣大難可得思議菩薩悉能分別知

疏五十方下一十七偈頌第四位德大用於中三。

初一總

一切世界兜率中自然覺悟人師子

功德廣大淨無等 如其體相悉能見
或現降神處母胎 無量自在大神變
成佛說法示滅度 普偏世間無暫已
人中師子初生時 一切勝智悉承奉
諸天帝釋梵王等 麽不恭敬而瞻侍
十方一切無有餘 無量無邊法界中
無始無末無遐邇 示現如來自在力
人中尊導現生已 遊行諸方各七步
欲以妙法悟羣生 是故如來普觀察
見諸衆生沉欲海 盲闇愚癡之所覆

人中自在現微笑

念當救彼三有苦

大師子吼出妙音

我爲世間第一尊

應然明淨智慧燈

滅彼生死愚癡闇

人師子王出世時

普放無量大光明

令諸惡道皆休息

永滅世間衆苦難

或時示現處王宮

或現捨家修學道

爲欲饒益衆生故

示其如是自在力

如來始坐道場時

一切大地皆動搖

十方世界悉蒙光

六趣衆生成離苦

震動一切魔宮殿

開悟十方衆生心

昔曾受化及修行 皆使了知真實義
十方所有諸國土 悉入毛孔無有餘
一切毛孔刹無邊 於彼普現神通力
一切諸佛所開演 無量方便皆隨悟
設諸如來所不說 亦能解了勤修習
徧滿三千大千界 一切魔軍興鬪諍
所作無量種種惡 無礙智門能悉滅
如來或在諸佛刹 或復現處諸天宮
或在梵宮而現身 菩薩悉見無障礙
佛現無量種種身 轉於清淨妙法輪

乃至三世一切劫

求其邊際不可得

寶座高廣最無等

徧滿十方無量界

種種妙相而莊嚴

佛處其上難思議

諸佛子衆共圍繞

盡於法界悉周徧

開示菩提無量行

一切最勝所由道

諸佛隨宜所作業

無量無邊等法界

智者能以一方便

一切了知無不盡

諸佛自在神通力

示現一切種種身

或現諸趣無量生

或現殊女衆圍繞

或於無量諸世界

示現出家成佛道

乃至最後般涅槃

分布其身起塔廟

如是種種無邊行

導師演說佛所住

世尊所有大功德

誓願修行悉令盡

以彼善根迴向時

住於如是方便法

如是修習菩提行

其心畢竟無厭息

疏次二十三別頌因果八相等

如來所有大神通

及以無邊勝功德

乃至世間諸智行

一切悉知無不盡

如是一切人中主

隨其所有諸境界

於一念中皆了悟

而亦不捨菩提行

諸佛所有微細行 及一切刹種種法

於彼悉能隨順知 究竟迴向到彼岸

疏後三頌能知之德

有數無數一切劫 菩薩了知卽一念

於此善入菩提行 常勤修習不退轉

疏六一偈頌第八知劫智。

十方所有無量刹 或有雜染或清淨

及彼一切諸如來 菩薩悉能分別知

疏七一偈頌第六世界智。

於念念中悉明見 不可思議無量劫

如是三世無有餘 具足修治菩薩行
於一切心平等入 入一切法亦平等
盡空佛刹斯亦然 彼最勝行悉了知

疏八二偈頌第七法界智。

出生衆生及諸法 所有種種諸智慧
菩薩神力亦復然 如是一切無窮盡

疏九一偈頌第九知法智。以法與法界性相互舉。
前分二門義必相通。偈居一處。

諸微細智各差別 菩薩盡攝無有餘
同相異相悉善知 如是修行廣大行

十方無量諸佛刹 其中衆生各無量
趣生族類種種殊 住行力已悉能知
疏十有二偈頌一切法智。

過去未來現在世 所有一切諸導師
若人知此而迴向 則與彼佛行平等
若人能修此迴向 則爲學佛所行道
當得一切佛功德 及以一切佛智慧
一切世間莫能壞 一切所學皆成就
常能憶念一切佛 常見一切世間燈
菩薩勝行不可量 諸功德法亦如是

已住如來無上行

悉知諸佛自在力

疏成益位果二段可知

論第七已下。有一百二行頌文義自具。兩行一頌。
第二隨文釋義者。云何爲無著無縛解脫廻向爲
無性理智無依。卽一切無著。一切無縛。是故經云。
甚深微細智。修菩薩行。住普賢道。若文若義。皆如
實知。生如影智。生如夢。如幻。如響。如化。如空。乃至
無所依等智生也。

第九無著無縛解脫廻向竟

大方廣佛華嚴經疏論纂要卷第五十七

福城比丘尼弘坦弘

博傳隆傳清傳覺

一貫傳慧傳師傳徹

傳峯一機一鼎一

華信女孟傳證何招姐

同刻

華嚴經十廻向品疏論纂要第五十七
卷伏願衆等遊法界海入禪華林多生
之宿障冰清究竟之菩提果滿

康熙二十二年九月

日華藏室謹題